

本草彙言

前胡味苦微甘。氣溫。無毒。陽

中之陰。降也。乃手足太陰

明之藥。與柴胡清陽上升。

入手足少陽厥陰者不同也。

蘇氏曰。前胡南北諸道皆有。

生下濕地。今出吳興者功

勝。初春生苗青白色。似斜

蒿。初出有白芽。長三四寸。味

甚香美。七月開紫白花。與

蔥花相似。八月結實。根青紫

色。乾則外黑內黃白。八月

採根暴乾。苗生柴胡之前。故

名前胡。王氏曰。前胡南

北皆有。其品甚多。良醜不一。

又汴京北地者。色黃白。枯

脆絕無氣味。江東有三四種。

一種類當歸。皮斑黑。肌黃

而脂潤。氣味濃烈。一種色理

黃白。似人參而細短。香味

俱微。一種似草烏頭。膚赤而

堅。有兩三歧。食之戟人咽

喉。惟以薑汁浸搗服之。能下

膈。開痰結。皆非真前胡也。

今最上者。出吳中。及壽春皆

類柴胡。氣芳烈。味亦濃苦。

療痰下氣最勝。諸道者。李

蘇湖曰。前胡有數種。惟以

苗高一二尺。色似斜蒿。葉如

野菊而細瘦。嫩時可食。秋

月開紫白花。又類蛇床子。花

其根皮黑肉白。有香氣。為

真。大抵北地者為勝。故方書

稱北前胡云。○一種野蒿

根。類前胡。悞用令人反胃。

不受食。真前胡味苦微甘

野蒿根味苦微酸。可別也。

證咳嗽痰喘聲重氣盛此邪在肺經也傷寒之證頭痛惡寒發熱骨疼此邪在膀胱經也胸脇痞滿氣結不舒此邪在中膈之分也又妊娠發熱飲食不甘小兒發熱瘡疹未形大人痰熱逆氣隔拒此邪氣壅閉在腠理之間也用前胡俱能治之但苦辛而溫能散有餘之邪熱實痰而不可施諸氣虛血少之病故凡陰虛火熾煎熬真陰凝結爲痰而發咳嗽者真氣虛而氣不歸原以致胸脇逆滿者頭痛骨疼不因于痰而因于陰血虛少者內熱心煩外現寒熱而非外感者法並禁用大抵此劑與柴胡不同柴胡性味寒苦入少陽厥陰治在半表半裏以清往來之熱前胡性味溫辛入太陽太陰專攻初

病之時以清表開之熱然柴胡之性專于上升而前胡之功專于下氣故治痰熱喘嗽痞膈逆氣胎脹諸疾氣降則痰降痰降則火亦降矣與柴胡治證不同而所入所主亦有異耳

金靈昭先生曰前胡辛溫而散功能下氣治寒熱喘嗽復能升出又可退瘡癩出痘疹柴胡苦寒而清功能上行清陽升引胃氣上達而復能降入又可調血和營出入升降二藥各自有互通之用也

門人羅一經曰前胡去寒痰半夏去濕痰南星去風痰枳實去實痰薏仁治燥痰貝母麥門冬治虛痰黃連天花粉治熱痰各有別也

廣濟方。治風熱痰壅喘。上氣用前胡同杏仁。桑白皮。

甘草桔梗。○治一切實痰。用礞石滾痰丸方中。用前胡。

易黃芩石殊功。○治時疫寒熱。用前胡同羌活。乾葛黃。

芩。柴胡。天花粉。

柴胡味苦寒。無毒。氣味俱輕。陽也。升也。入手足少陽厥陰。

四經欲上升則用根欲下降則用稍。

蘇氏曰柴胡山弘農川谷及宛句今關陝江湖近道亦有以銀州者為勝銀州即寧夏衛也十一月根生白莖而稍緊小亦有似邪蒿者亦有似麥門冬葉而稍短者七月開黃花根淡赤色似前胡而強硬如柴故名柴胡惟丹州考結青子與他處不同其根似蕪頭有赤毛如鼠尾獨窠而長者佳生處香氣直上雲間多有白鶴飛翔人有過其圃者聞之皆氣爽也李氏曰銀州者根長尺餘微白而軟皮嫩肉有黃紋不易得也清虛勞骨蒸最妙北地所產者如前胡而強謂之北柴胡清傷寒解半表半裏之邪最效南土所產者不似前胡有似蒿根強硬不堪用最下者○近時有一種根似倍梗沙參白色而大市人偽充銀柴胡殊無氣味不可不辨。

○柴胡能條達肝氣升清降濁之藥也解傷寒清少陽半

表半裏之邪調血氣疎肝膽已結未結之疾其味苦寒

可以清熱其性輕揚可以散邪故治少陽傷寒寒熱往來口苦嘔逆胸脇滿悶頭角作痛等證或溫瘧癰瘡邪熱不清或邪陷陰中日晡發熱又治婦人熱入血室譫語妄見并經水不調寒熱交作又治小兒五疳癯熱能食而瘦痘後餘熱兩眼赤爛等證悉用柴胡治之因其味之苦寒而散性之輕揚而達能發越屈曲不正之氣也前人又謂治勞熱若勞熱在肝膽心及胞絡三焦脾胃者用之有驗若勞熱在肺腎者用之無益耳病人元虛而氣升者嘔吐及陰虛火熾炎上者法皆禁忌

朱東生先生曰柴胡少陽厥陰主藥輕清而升苦寒而降散表邪除頭痛退寒熱止脇痛和表裏調血氣

疾升下陷降濁陰。性性疎散。凡病肝鬱憤悶不平者服之最靈。

倪朱謨曰柴胡有銀柴胡北柴胡軟柴胡三種之分。銀柴胡出關西諸路。色白而鬆。形長似鼠尾。北柴胡出山東諸路。色黑而細密。形短如筴。軟柴胡出海陽諸路。色黑而輕軟。一名三種也。氣味雖皆苦寒。而俱入少陽厥陰。然又有別也。銀柴胡清熱。治陰虛內熱也。北柴胡清熱。治傷寒邪熱也。軟柴胡清熱。治肝熱骨蒸也。其出處生成不同。其形色長短黑白不同。其功用內外兩傷。主治不同。胡前人混稱一物。漫無分理。日華子所謂補五勞七傷。治久熱羸瘦。與經驗方治勞熱。青蒿煎丸少佐。

柴胡言銀柴胡也。衍義云：本經並無一字治勞，而治勞方中用之。鮮有不悞者。言北柴胡也。然又有真藏虛損原因肝鬱血閉成勞，虛因鬱致熱由鬱成軟柴胡亦可相機而用。如傷寒方有大小柴胡湯，仲景氏用北柴胡也。脾虛勞倦用補中益氣湯，婦人肝鬱勞弱用逍遙散，青蒿煎丸少佐柴胡，俱指軟柴胡也。業醫者當明辨而分治可也。

沈則施先生曰：仲景治傷寒寒熱往來，口苦耳聾胸脇痛而無汗，設小柴胡湯，同參半苓草。○又治少陽經正瘧，并似瘧非瘧，寒熱不時等病。○又治傷寒表裏俱急，設大柴胡湯，同枳樸大黃黃芩白芍等。二證皆屬少陽。

甲膽病也。柴胡稟仲春一陽之氣以生。若寒而潔。其氣升散。自下而上。以奉春升之發陳。化濁陰而載清陽。故前證之邪在少陽甲膽者。或少陽甲膽之邪。轉入裏者。無不奏效。讀農皇本草。所謂主心腹腸胃中結氣。飲食積聚。寒熱風邪。推陳致新。義在是矣。又傷寒百合病。有柴胡百合湯。又東垣治勞傷元氣精神倦怠。有補中益氣湯。用參耆歸朮等。佐以升麻。柴胡引脾胃之氣行陽道。可見柴胡妙用。又不止于散邪退熱而已。

本事方云。治傷寒後餘熱未淨。體瘦肌熱。用小柴胡五錢。甘草一錢。水煎服。○聖濟總錄治小兒十五歲以下。遍身如火。日漸黃瘦。欬嗽煩渴。骨蒸盜汗。用銀柴胡爲

未因兩。硃砂為細末。二錢。豬膽汁。拌和。飯上蒸過。晒乾。為丸。如綠豆大。每服五丸。桃仁湯送下。○男婦虛勞發熱。或咳或不咳。用銀柴胡。沙參。各等分。每服二錢。水煎服。

續補集方。治濕熱黃疸。用柴胡。茵陳。各等分。水煎服。○

治眼目昏暗。用柴胡一錢。為末。羊肝煮熟。蘸食。食肝三十箇。用柴胡三兩。自明。○治積熱下痢不止。用柴胡。黃

芩。各四錢。水煎服。五劑愈。

一錢。麥門冬。五錢。知母。石

斛。水二碗。煎入分。不

服者。用柴胡。半夏。厚朴。陳皮。各二錢。如前煎服。

一服。水二碗。煎入分。不

防風味辛甘，氣溫，無毒，氣味俱薄，浮而升，陽也。手足太陽

二經本藥，又行足陽明、太陰、二經，為肝經氣分藥也。

李時珍曰：防者禦也。其功禦風最捷。故名曰芸。曰苗。曰

蘭。根者其花如茴香，其氣如芸蒿。蘭也。今出彭城、蘭

陵、琅琊、鬱川、百市者佳。○蘇氏言出齊州龍山最善。淄

州、兗州、青州者亦佳。二月生芽，紅紫色，作茹柔嫩。與日

三月莖葉轉青，葉深紫淡，似青蒿而短小。五月開花，似

蔣蘿花，細小而白，攢簇作房，似胡荽子而稍大。九月採

根，似葵根而黃色，又江淮間一種石防風，生山石間。二

月採嫩苗作茹，辛甘而香，呼為珊瑚菜，長大葉青，花白

其根粗醜，似蒿根，其子亦可種。修治去又頭，又尾及枯

黑者，又頭食之令人發狂，又尾令人發痲疾也。○又關

中生者，三月六月採之，然輕虛不

○防風散風寒濕痺之藥也。故主諸風週身不遂，骨節痠

疼，四肢攣急，痲筴痲痺等證。又傷寒初病，太陽經頭痛

發熱，身疼無汗，或傷風咳嗽，鼻塞咽乾，或痘瘡將出，根

點未透。用防風辛溫輕散。潤澤不燥。能發邪從毛竅出。
 故外科癰瘍腫毒。瘡痍風癩諸證。亦必需也。為卒伍之
 職。隨引而效。如無引經之藥。亦不能獨奏其功。故與芎
 芷上行。治頭目之風。與羌獨下行。治腰膝之風。與當歸
 治血風。與白朮。治脾風。與蘇麻。治寒風。與芩連。治熱風。
 與荆栝。治腸風。與乳桂。治痛風。及大人中風。小兒驚風。
 防風盡能去之。若入大風厲風藥中。須加殺蟲活血藥。
 乃可。至如產後血虛發瘕。角弓反張。血虛痿躄者。頭痛
 不因于風寒寒濕者。及陰虛盜汗。陽虛自汗者。諸證法
 宜禁用。

盧不遠先生曰。四大中風力最勝。執持世界。無不入。

設人身腠理疎泄則生氣有所不衛風斯入焉又云身
本四大合成以動搖爲風則凡身中宜動處不動卽是
風大不及宜動處太動卽是風大太過防風黃中通理
甘溫辛發濡潤和暢勻而平之斯無過不及

治半身不遂用防風秦艽天麻羌活白芷當歸白朮

治五癰痰厥發則仆地或作畜聲口唾涎沫用防風半

夏膽星天麻人參耆朮治太陽傷風寒頭痛用防風

羌活生薑紫蘇治痘疹出而未透用防風荆芥羌活

牛蒡子桔梗蠅退甘草治癰疽腫毒用防風同解毒

散治表虛自汗用防風黃耆白芍藥解利肺經傷

風用防風甘草桔梗紫蘇桑白皮杏仁加薄荷石膏兼

除風熱

○續補集方治婦人血崩用防風蒲黃炒各等分爲末每服三錢白湯調下累試有驗

○治瘡疹不透發用防風五錢西河柳一兩水煎代茶飲瘡毒立時發出○治久病泄瀉不止用防風五錢酒洗炒於白朮四錢土拌炒骨碎三錢酒洗炒加黑棗五個生薑三片水煎服

○治男人便血久不止用防風升麻各二錢黃耆白朮熟地各三錢炮薑同炒錢水煎服

獨活味苦甘辛。氣溫。無毒。氣味俱泄。浮而升。陽也。足少陰。

行經氣分血分之藥。

寇氏曰。獨活是羌活母也。出漢蜀西羌者。良春生。指狀如青麻。一莖而上。有風不動。無風自搖。故名獨搖。草六月開花。作叢或黃或紫。生砂石中者。葉微黃。生肥土中者。葉青翠。有兩種。一種形大有日如鬼眼者。今人呼為獨活。一種鱗頭。較節色黃紫。臭之如蜜。蠟香。今人呼為羌活。近以老前胡及土當歸。長尺許。白肉黑皮。氣亦芬香。如白芷。用充獨活。不可不辨。○蘇氏曰。羌活獨活。乃一種二物。正如川芎。樨芎。雲木。腿木之義。入用微有不。同。後人以爲二種者。非矣。今人以紫色節密者為羌活。黃色作塊者為獨活。今蜀中有大獨活。類羌活。微黃而極大。收時寸解之。氣味亦芳烈。又有魏葉氣者。用之極效。醫意此為真者。今市人或擇羌活之大者為獨活。殊為未當。○李時珍曰。乃一類二種。以中國者為獨活。西羌者為羌活。蘇氏所說甚明。又按易簡方云。羌活須用紫色。有鱗頭。較節者。獨活是極大羌活。有如鬼眼者。○又按獨活一名羌活。本非二物。後人見其形色氣味不同。故為異論。然物多不齊。物之情也。一種之中。自有不同。有緊實者。有輕虛者。仲景用獨活治少陰。必緊實者。

東垣用羌活治太陽必無虛者正如黃芩取中非而飄者各宿芥治太陽固實而堅者各子芥治陽明之義相同也。

○獨活善行血分祛風行濕散寒之藥也。凡病風之證如頭項不能屈伸腰膝不能俛仰或痺痛難行麻木不用皆風與寒之所致暑與濕之所傷也必用獨活之苦辛而溫活動氣血祛散寒邪故本草言能散脚氣化奔豚療疝瘕消癰腫治賊風百節攻痛定少陰寒鬱頭疼意在此矣。

○羌活祛風逐濕升陽發散之藥也。如頭痛自疼發熱惡寒腰脊強痛四肢拘急乃風寒之證也。或頭重目眩四肢怠惰腰膝拳攣難以俯仰乃風濕之證也。以此苦辛

之劑。功能條達肢體。通暢血脈。攻徹邪氣。發散風寒。風濕故癆。證以之能排膿托毒。發潰生肌。曰證以之治差。明隱滯。腫痛難開。風證以之治痿。瘳癩。麻痺厥逆。蓋其體輕而不重。氣清而不濁。味辛而能散。性行而不止。故上行于頭。下行于足。遍達肢體。以清氣分之邪。之神藥也。○又有血虛頭痛。及遍身骨痛。因而兼寒熱者。此屬內虛。當用歸。芎。熟地。白朮。知母。枸杞。丹皮。等類。誤用風藥。反致增劇。

丹溪先生云。獨活。羌活。均能祛風燥濕者也。然而表裏上下氣血之分。各有所長。羌活氣雄。入太陽。外行皮表。而內達筋骨。氣分之藥也。獨活氣細。入少陰。內行經絡。

而下達足膝血分之藥也。所以羌活有風寒發散之功而解太陽。故自證瘍證。風痺等證。爲必用也。獨活僅可爲風濕寒邪之用。而治少陰厥陰。故奔豚疝瘕腰膝脚氣等疾。爲必用也。二物一種。其主治有不同者如此。

繆仲淳先生曰。羌獨二活。稟天地正陽之氣以生。名列君部。非比柔懦之主。大無不通。小無不入。却亂反正之上藥也。故能開萬竅而出八風之邪。通四大而利關節之鍵。羌獨本同一種。但分質有老嫩。虛實。氣有厚薄。緩急之殊耳。

盧不遠先生曰。動搖萬物者。莫疾乎風。故萬物莫不因風以爲動搖。惟獨活不然。有風獨立不動。無風獨能自

搖在蜀名獨活。在羌名羌活。隨地以名。亦隨地有差等。其從治一切不能獨立不動。而爲風寒刀剪之所擊。因風而痛者。及奔豚痲痺之因風。以爲動搖者。女子痲癢。因風以爲豎築者。惟獨活氣味溫辛而苦。復因風而及乎上下。因風而出入開闔。能啓太陽之闔。而開能入厥陰之開。而闔。具備風木化氣之體用者。故奏功獨捷歟。繆仲淳先生曰。獨活羌活。陽草中之風藥也。本爲祛風散寒除濕之要品。風能勝濕。以其性燥故也。本草諸書並載主中風及諸風。不知真中風。惟西北邊塞高寒之地。風氣剛猛。虛人受之。往往卒中。或口眼歪斜。或口噤不語。或手足癱瘓。左右不仁。或剛瘥柔瘥。角弓反張。此

藥與諸風藥並可用也。若夫江南吳楚越閩百粵鬼力
梁州之域。從無剛勁之風。多有濕熱之患。質柔氣虛。多
熱多痰。其患中風如前等病。外證雖一一相似。而其
實非。卽劉河間所謂將息失宜。水不制火。丹溪所謂中
濕中痰。中氣是也。此則病係氣血兩虛。虛則內熱煎熬。
津液結而爲痰。熱則生風。故致卒倒。亦如真中風狀。而
求其治療之方。迥若天淵。外邪之氣勝。則實。實則瀉之。
祛風是已。如內而真氣不足。則虛。虛則補之。調氣補血。
生津清熱是已。倘誤用風藥。反致燥竭其津液。血愈不
足。而病愈沉困。命曰虛虛。攻補既謬。死生遂殊。粗工懵
昧。執迷不悟。茲特表而明之。

廣濟方云治冬月傷寒太陽經頭痛身疼發熱惡寒無汗者用羌活杏仁甘草○治太陽陽明頭痛兼遍身骨痛用羌活入葛根湯○治四時感冒風寒用羌活沖和湯○治下身一切風濕濕熱用羌活蒼白朮秦艽生地苡仁木瓜草薢黃蘗○治風熱上攻齒牙腫痛用羌活赤芍生地薄荷荆芥蔓荆子石膏○六經頭風頭痛用羌活川芎蒼耳荆芥黃芩天麻

陳延之小品方云治中風不語用真獨活一兩炒黃大豆五合炒黑以酒乘熱投蓋之良久溫服二合未瘥再服○治產後中風語澀四肢拘急用真川羌活二兩爲末每服五錢水煎服外臺秘要治歷節風痛用真川

羌活松節各等分酒煮每早晚各飲一杯。○治風牙腫痛用真川獨活煮酒熱嗽之。

○續補集方治脚氣腫脹痛用真川獨活五錢木瓜牛膝各一兩共為末每服三錢空心白湯調下。○治奔豚氣或癢疝攻築疼痛用真川獨活羌活各一兩吳茱萸三錢荔枝核小茴香各五錢共為末每服三錢空心白湯調下。○治下部癰腫用獨活羌活各二錢防風柴胡桔梗金銀花連翹川芎赤芍藥各一錢五分水煎服。○治賊風百節攻痛用川獨活羌活防風當歸各二錢水煎服。○治少陰寒鬱頭痛用川獨活五錢防風二錢水煎服。

升麻味苦微辛。氣寒。氣味俱薄。浮而升。陽也。為足陽明大

陰引經之藥

蘇氏曰升麻生蜀漢陝西淮南州飛以川蜀者為勝。生苗高三尺。葉似麻莖青色。四月五月開花似粟穗。白色。六月結實。黑色。根如蒿根。紫黑色。多鬚。陶弘景曰舊出寧州者殊勝。形細而黑。極堅實。今出益州者細小而堅。削去皮。青綠色。謂之雞骨。升麻亦佳。北郡建平一種。虛大黃白色。味薄。嵩高一種。純青色。質亦堅。又一種。外黑裏白。質亦緊實。謂之鬼臉。升麻前不堪用。俱不如川蜀青綠色者為最也。又一種。落新婦根。其形相似。氣與色俱非。方同升麻。用千兒科解毒。瘡瘻方中稍可。餘不然也。用者不可不辨。修事去皮暴乾用。

○升麻散表升陽之劑也。療傷寒解陽明在表發熱頭額

鼻乾不得眠之邪辟瘟疫吐蠱毒惡厲之氣發痘瘡干隱密

之時化癥毒于延綿之際但味苦寒平稟天地極清之

體故能効升散之用所以風寒之邪發熱無汗風熱之

邪頭風攻痛并目疾腫赤乳蛾喉脹升麻並皆治之。又如內傷元氣脾胃衰敗下陷至陰之分或醉飽房勞有損陽氣致陷至陰之中或久病瀉痢腸氣下陷後重窘迫或久病崩中陰絡受傷淋瀝不止或胎婦轉胞下墜小便不通或男子濕熱下注腰膝沉重或瘡毒內陷紫黑脹痛或大腸氣虛肛墜不收升麻悉能療之。此升解之藥故風可散寒可驅熱可清瘡疹可解下陷可舉內伏可托諸毒可拔。又諸藥不能上升者惟升麻可以升之。觀其與石膏甘草治齒痛與人參黃耆補上焦不足與桔梗欬冬治肺癰膿血意可見矣。但屬陽性升凡吐血衄血咳嗽氣急陰虛火動及氣逆嘔吐怔忡癲狂等

證一切禁用。

沈起愚先生曰。升麻稟天地清陽之氣以生。故能升陽氣于至陰之下。顯明滅暗。致新推陳。升麻兩得之矣。

虛子由先生曰。升卽四氣之先機。時令之首兆也。經云。春三月。此謂發陳者是矣。設無成功之藏之入。亦無將來之生之升矣。所謂柔以時升。積小以高大。實非決驟之比。

廣濟方云。升麻葛根湯散。足陽明之熱邪。發手太陰陽明之疵疹。及天行豌豆瘡。○治噤口痢。用升麻醋炒綠。色配蓮肉人參極驗。○治過食冷物。陽氣鬱遏。四肢發熱。腹滿口不渴者。入升陽散火湯用之。○治一切風毒。

熱毒及癰疹麻子等證。用升麻、牛旁子、荆芥、玄參。○治
蠱毒、中惡、惡腐諸證。升麻同鬱金磨服。不吐則下。○治
小兒尿血。用升麻、生地、麥門冬、牛膝、蒲黃。○治喉痺作
痛。用升麻片含嚥。或用五錢煎服。取吐。○治腫毒卒起。
用升麻一段磨醋頻塗之。○治口舌生瘡。用升麻一
錢、川黃連三分。共爲末。不時含嚥。○治熱沸瘙癢。用升
麻煎湯飲并洗之。○產後惡血不盡。或經月經年。以升
麻一兩、清酒二升。煮取一升。頻服。當吐惡物極良。○解
莫若毒。用升麻、煮汁頻服之。○解射工溪毒。用升麻烏
髮煎水服。以滓塗之。

○續補集方治瀉痢經月脾胃衰虛陽氣下陷後重窘迫與初病積滯後重不埋宜補而升之用升麻白朮乾薑黃耆人參各一錢五分甘草陳皮各八分加黑棗三枚水煎服○治婦人久病崩中陰絡受傷淋瀝不止用升麻川芎各一錢當歸身人參續斷杜仲石斛各一錢五分龜膠阿膠炮薑灰金櫻子各二錢加黑棗三枚水煎服○治胎婦轉胞下墜小便不通用升麻柴胡各一錢五分當歸川芎牡丹皮茯苓車前子各一錢加黑棗三枚水煎服○治男子濕熱下注腰膝沉重不能動履用升麻二錢牛膝木瓜白朮茯苓猪苓肉桂蒼朮黃柏各一錢六分水煎服○治癰疽發背裏氣空虛毒氣內

陷瘡口紫黑脹痛用升麻一錢五分人參黃耆白朮白

芷穿山甲各三錢如虛極甚大便泄者加乾薑肉桂附

子童便製各四錢水煎服○治裏氣衰虛大腸氣陷肛

墜不收用升麻柴胡各二錢黃耆白朮人參白芍藥北

五味子各一錢內熱甘者加川黃連八分水煎服○治

小便淋瀝澀痛不通用升麻八錢甘草五錢滑石三錢

蓮子肉五十粒水五煎二碗服○治感冒發熱惡寒

頭疼身重咳嗽喘急欲成疹此藥專治風寒及四時

不正癘疫妄行並宜服之用升麻川芎麻黃白芷紫蘇

二錢甘草五分生薑二片水煎服藜蘆膠悶加厚朴枳

殼咳嗽喘急加杏仁半夏嘔吐加藿香半夏癩加草四

楨柳痢加枳殼黃連

苦參味苦氣寒無毒氣沉純陰足少陰腎經主藥治本經

須用能逐濕

李時珍先主曰苦以味名參以功名生汝南山谷及田
野道處處有之苗高三四尺葉細碎青色極似槐葉
春生冬凋花色黃白七月結實如菜蕪莢內有子二三
粒如小豆而堅根三五莖並生長五七寸兩葉許大色
黃褐味極苦惡河北生者無花子苗莖根葉皆相若也
五六十月採根暴乾製法用濃糯米泔浸一宿其腥
穢氣並浮在水
面切片研碎用

○苦參祛風瀉火燥濕去蟲之藥也化癥瘕散心腹之結

氣逐黃疸治脚氣之脛疼又治厲風癩疾遍身疙瘩甚
則眉髮墮落并一切風癬風癢搔癢風屑及時瘡破爛
膿水浸淫或腸風下血腸痔痔血諸證統屬濕熱血瘀
之病也此劑苦可除熱寒可涼血燥可勝濕蓋東南之

地。皆是濕生。熱生風。風勝則下。血熱勝則生瘡。惟苦參皆可治也。前入謂苦參補腎補陰。其說甚謬。蓋此藥味苦氣腥。陰燥之物。穢惡難服。惟腎氣實而濕火勝者。宜之。若火衰精冷。元陽不足。及年高之人。胃虛氣弱。非所宜也。况有久服而致腰重者。因其氣降而不升。實傷腎之謂也。何有補腎補陰之功乎。書之不足盡信者。以此。

沈拜可先生曰。苦參苦寒。燥脾胃之濕熱。兼洩氣分血分之濕熱。故協治癥瘕。瘰結氣。黃疸便紅。脚氣癰腫。熱毒皮風。煩燥。厲毒。疔瘡。瘰癧等諸疾。由于風雨飲食濕熱而成者。所以農皇本草云。有安五藏平胃氣之功焉。

廣濟方云臘月以米醋漬苦參入瓶中封固主一切天
 行熱病頭痛口渴身熱甚及發狂者飲杯許得吐即愈
 汗亦如之○治大麻風癩用苦參胡麻皂莢刺當歸川
 芎牛膝漆葉龍膽草斲蛇○治久失饑之人驟食多食
 胃氣濕熱薰蒸成黃為疸證者用苦參龍膽草為末作
 丸如梧桐子大每服十餘丸○治童子胃熱羸瘦疳蚘
 用苦參川黃連白朮○治熱病狂用不避水火欲殺人
 用苦參末三錢薄荷湯調服○治中惡心痛用苦參三
 兩水煎服亦治飲食中毒及毒魚猪菜等物○治如娠
 飲食如故小便難出用苦參貝母當歸各二兩為末每
 服二錢白湯送下○治齒縫出血用苦參一兩枯白礬

一錢共為末。日三。搗之立驗。○治肺熱遍身生瘡。用苦

參末。九粟米大。每服百餘丸。白湯下。○治遍身風疹。痺

痛不可忍。胸頸臍腹及隱處皆是。多痰涎。夜不得睡。用

苦參末一兩。先用皂角二兩水一升。揉摸取汁。淨器熬

成膏。和苦參末九梧桐子大。每服百丸。食後溫湯服。○

治瘰癧結核。用苦參四兩。牛膝汁為丸。錄豆大。每白湯

服三錢

○續補集方治腸風下血。腸澼痔血諸證。用苦參二兩。川

黃連一兩。俱酒浸一宿。晒乾炒。甘草木香各五錢。白芍

藥一兩二錢。醋浸炒。共為末。錫糖為丸。如梧子大。每早

服三錢。白湯下。

玄胡索味苦辛。氣溫無毒。可升可降。陰中陽也。入手足太

陰厥陰經。行血中氣。滯氣中血。滯之藥。

李時珍先生曰。生東北夷方。今二茅山上龍洞。及仁和寬橋亦種之。寒露後栽種。置春後生。苗高三四寸。延蔓布地。葉必三之。宛如竹葉。片片成個。細小嫩綠。邊色微紅。作花黃色。亦有紫色者。根叢生。蔓延結如芋。粗亦如半蔓。但色黃耳。立夏後抽塊。洗淨。酒浸蒸。曬乾。得濕。其味尤良。活血化氣第一。

○玄胡索通經絡。行血中氣。滯氣中血。滯之藥也。凡治男

婦長幼一身上。諸因氣滯血滯為病者。然于婦人為

尤宜。故病血氣積聚腹中結塊。癥瘕脹滿。或崩中淋瀝

漏下不止。或惡露攻衝。惡心眩暈。是皆婦人血分之病

也。又于男子可治之證。疝核痛。暴腰痛。心胃卒痛。小腹

脹痛。是皆厥陰氣分之病也。俱以此藥治之。凡用之行

血酒制則行用之止血醋制則止用之破血非生用不可用之調血非炒用不神隨病制宜應用無窮者也但性味溫辛能走而不能守故經事先期與一切血熱或崩中淋露應用補氣血涼血清熱藥者一切辛走之藥法所必禁。

繆仲淳先生曰玄胡索稟初夏之氣而兼得乎金之辛味故辛溫則能和暢和暢則氣行辛溫則能潤而走散走散則血活血活氣行故能主破血及產後諸病因血所爲者婦人月經之所以不調者無他皆氣血不利因而凝滯則不能以時至而多後期之證也腹中結塊產後血暈暴血衝上因損下血等證皆須氣血和而後愈

故悉主之也。崩中淋露，利守不利走。此則非與補氣血藥同用，未見其可。

盧不遠先生曰：名玄而色黃，醞金氣也。氣溫而味辛，秉金制也。以一春而備四氣，葉必三之。具木生數象，形對待肝血之非其所藏，而玄爲破堅之線索無疑矣。以言疾疚之證，因以言主治之功力，判屬血中之氣藥。氣中之用藥也。蓋氣主嘔之血，主濡之氣之所不嘔，卽血之所不濡矣。如腹中結塊，膜絡癥瘕之爲證，卽血留營實之爲因。如臏腹氣塊盤繞之爲證，卽氣滯衛實之爲因。如崩中淋露，運衄衄暴之爲證，卽血苑營泣之爲因。如奔豚逆厥，百體疼痛之爲證，卽氣弛衛薄之爲因。玄胡

立鼓血中之氣。震行氣中之用。虛則補實則平。推陳致新之良物也。

茹永之先生曰。幽深邃遠曰玄。邊甸荒服曰胡。索取而竭之也。此指玄胡索之功用。行瘀血。活滯血。推死血。凡人身藏府膜原谿谷隧道偏僻幽隱之處。一切行血藥之所不及至者。玄胡索取而竭之無餘留矣。命名者以此也夫。

廣濟方治產後血暈。用玄胡索。當歸。生地。牛膝。川芎。甘草。童便。○聖惠方治產後諸病。凡產後穢污不盡。腹滿及產後血暈。心頭鯁悶。或寒熱不禁。手足煩熱。氣力欲絕者。用玄胡索酒炒研末。酒服二錢。○直指方治疝氣。

危急用玄胡索鹽水炒全蝎生用各等分研末空心鹽酒下。○又方治冷氣腰痛用玄胡索當歸肉桂各等分研末溫酒服三四錢隨量頻進以愈為度。○又方治熱厥心痛或發或止久不愈身熱足寒者用玄胡索金鈴子肉各等分為末白湯下二錢。○濟生方治婦人腹中刺痛經候不調用玄胡索醋炒當歸酒炒各一兩香附醋炒一兩五錢共為末神麩醋打糊為丸梧桐子大每服百丸空心白湯下。○治本下痢腹痛用玄胡索醋炒為末米飲調服三錢。○治小兒生盤腸氣痛用玄胡索醋炒大茴香炒各等分為末大人三錢小兒一錢白湯調服。○治墮落車馬跌撲筋骨痛不止用玄胡索為末生酒

調服三錢

○續補集方治男婦方氏本集血氣積聚腹中結塊癥瘕脹滿或崩

中淋瀝漏下不止或穢露攻衝惡心眩暈用玄胡索四

兩醋浸炒當歸身川芎各一兩五錢酒洗炒香附三兩

童便浸炒炮薑灰牡丹皮焙各二兩共爲末水發爲丸

梧子大每早服三錢白湯下○治婦人女子經血不調

爲一切腹內脹滿痛滯諸疾用玄胡索醋炒益母葉酒

炒香附米童便浸炒當歸川芎俱酒炒各二兩共爲末

煉蜜丸如梧子大每早晚各食前服三錢白湯下裏寒

大便不實者加肉桂木香白朮各一兩元本虛弱者加

人參黃耆各一兩

貝母味甘氣寒無毒入手太陰少陰經可升可降陰也

李氏曰貝母生蜀中及晉地又出潤州荊州襄州者亦佳江南諸州及浙江金華象山亦有但味苦惡儘可于

被血解毒藥中用之又河中江陵鄧壽隋鄭蔡潞州皆

有二月生苗葉隨苗出如蕎麥狀莖細青色七月開花

碧綠色形如百合花斜懸向下上有紅脉若似人肺八月採根根有瓣子黃白色如聚貝子一種葉如拓樓而

細小子在根下如芋子正白色連藥相着而可分解一種葉如韭而花色白根子亦作兩瓣也詩云言采其蔕即此其中有獨顆不作兩瓣者名曰龍睛誤食能軟筋脉以黃精小藍汁服之立解

○貝母開鬱下氣化痰之藥也安肺氣橫逆止虛勞喘嗽

之不寧退傷寒煩熱定心神火躁之不眠又散心胸鬱

結不得之氣并多愁鬱者殊有神功乃肺經氣分之藥

也甄權方散逆滿開喉痺消癰點目瘡仍取開鬱散

結氣之效也至于潤肺消痰止咳定喘則虛勞火結之

證貝母專司首劑。故配知母可以清氣。滋陰配芩連可
以清痰降火。配參耆可以行補不聚。配歸芍可以調氣
和營。又配連翹可以解鬱毒。治項下瘰核。配二陳代半
夏用。可以清肺消痰。和中降火者也。以上修用。必以川
者爲妙。若解癰毒。破癥結。消實痰。傳惡瘡。又以土者爲
佳。然川者味淡性優。土者味苦性劣。二者宜分別用。
繆仲淳先生云。貝母甘苦而寒。在地則得土金之氣。在
天則稟清肅之令。色白象金。而主肺。肺有熱。因而生痰。
或爲熱邪所干。喘嗽煩悶。有痰傷寒。煩熱有痰。胸中鬱
結。有痰頸項火癰。有痰等證。必此主之。至如寒濕痰食
積痰。或濕痰在胃。惡心欲吐。痰飲作寒熱。脾胃濕痰作

眩暈并痰厥頭痛中惡嘔吐胃寒嘔吐法應以辛溫燥熱之藥如南星半夏天麻蒼朮白朮茯苓之類治之貝母並禁用。

陳廷采先生曰世俗多以半夏有毒棄而不用每取貝母代之殊不知貝母乃太陰肺經之藥半夏乃太陰脾經陽明胃經之藥何得而相代耶且夫咳嗽吐痰虛勞吐血咯血痰帶血絲血屑咽痛喉閉肺癰肺痿婦人乳難癰疽及諸氣鬱等證此皆貝母爲專司也半夏乃爲禁用若涎者脾之液也美味膏粱炙煨火食皆生脾胃濕熱故涎化稠粘爲痰久則生火痰火上攻故令人昏惰不省人事口噤僵仆偏廢不仁蹇澁不語生死旦夕

自非半夏南星曷能治之若以貝母代之非所宜也

廣濟方云治傷寒陽明壯熱喘嗽有痰不得眠用貝母

前胡乾葛黃芩麥冬玄參○治肺熱痰嗽及胸中煩熱

用貝母知母天冬桑白甘草桔梗○治一切熱毒用貝

母紫花地丁金銀花鼠粘子甘草玄參○治一切虛勞

咳嗽骨蒸夜熱用貝母天冬麥冬懷生地地骨皮沙參

茯苓知母丹皮○治肺熱吐膿血用貝母百部百合薏

苡麥冬蘇子竹瀝童便○解一切氣鬱用貝母陳皮蘇

梗香附撫芎黃芩○治喉痺腫脹用貝母山豆根桔梗

甘草荆芥薄荷○治小兒百日咳痰壅用川貝母三

錢甘草廣橘紅各一錢共為末每服三五分

服。○治小兒鵝口。滿口白爛。用金華貝母。去心。爲末。白湯調。用白絹蘸藥抹之。日三四度。○治吹奶乳作痛。用川貝母末。酒調服二錢。仍令人吮之。卽消。○解蜘蛛咬毒。縛定咬處。勿使毒行。川貝母末。酒服五錢。良火毒水自瘡口出。水盡。仍塞瘡口。甚妙。并治蛇蝎咬傷。

○續補集方治虛火喘嗽不寧。用川貝母一兩。去心。研細末。每服二錢。淡薑湯調下。○治傷寒心虛內熱有痰煩躁。心神不寧。不能安睡。用川貝母五錢。研細末。每服二錢。燈心湯調下。

○治癩癧未破可消。用土貝母、甘草各二兩，微炒研末，肥皂二觔，去核。每個內藏班貓四個，用竹篾作架，放肥皂於上，蒸爛，取出班貓，并肥皂皮筋，取淨肉，搗爛如泥，加入貝母、甘草末爲丸，如梧桐子大。每食後服一錢五分。白滾湯下。倘腹疼勿慮，是此藥追毒之故。○治頰下生硬塊，或似石癭，用土貝母、何首烏各三兩，連翹、鼠粘子、天花粉、蒼耳子、青木香、白芨各二兩，黑棗百個，金銀花、紫花地丁、甘草、夏枯草各五兩，分作十劑，每劑用河水五碗，煎至二碗，徐徐服。

貫衆味苦氣微寒有毒

別錄曰貫衆生玄山山谷及宛句少室山中蘇氏曰今
陝西河東州郡及荆襄間多有之出陰山沂水處數根
叢生每根必有多莖貫之故名貫衆莖有三稜如蕨狀
大如筍有黑汁澀滑其葉兩兩對生如雞翎及鳳尾又
似狗脊葉而但無銜齒色青黃而深背淡四月開白色
花七月結實黑相聚聯卷而旁生其根曲而有尖黑鬚
叢簇亦似狗脊根狀及伏鴉皮黑肉赤直而多枝若百
枝狀冬夏不死雖乾枯見水即活人家置水缸中可吸
水底塵垢揚
之不使薄瀉

○貫衆殺蟲化癥之藥也前古主腹中邪熱結氣故時人

用為殺蟲化癥皆屬腹中邪熱濕鬱結氣也蘇氏方又
治下血崩淋衄血不止亦取氣味苦寒散結熱百莖貫
脈絡耳但性氣寒燥有毒如病人營虛血槁肝腎有火
并陰虛咳嗽人不可加用

○集方治腸風下血婦人崩淋瀝血久痢日下血水并積年白帶等疾並宜服之用貫衆五箇酒浸一日連鬚并肉肉俱切碎曝乾微炒配黑蒲黃丹參各減半俱酒洗炒共為末每早晚各食前服三錢白湯下○治漆瘡痛癢濕爛用貫衆一兩為末摻之即消

○治吐血成疝命在須臾用貫仲錢側栢葉搗汁一碗和童便一頓溫徐徐服之尋止如不止用

研末三錢髮灰五勺調入貫仲髮灰三兩煎湯頻灌即

止

紫草味苦氣寒無毒入足少陰厥陰經。

別錄曰紫草生礪山山谷及楚地李氏曰今出襄陽
從南陽新野來二月逐蠶下子苗似蘭香赤莖青節紫
花白實其實秋月乃熟春社前後采根頭有白毛如茸
以石壓扁曝乾收時忌入潮及驢馬糞并烟火氣不爾
能令根色黃也如未開花時采取根色鮮明如已開花
眼色黯黯染色不堪用也雷氏曰修治每觔用藥二兩
溶水拌蒸待水乾去頭并兩畔鬚細剉用

○紫草涼血解疹毒之藥也前古主利九竅通水道散五

疽逐心腹邪氣腫脹滿痛等疾凡關濕熱血熱氣閉火

結之證咸宜用之後人推廣此意通治斑疹痘毒欲出

未出之際根暈紫黑或已出仍紫黑乾枯口渴便閉熱

極者投之即透發鬱毒色轉紅潤誠為痘家起死回生

之首劑也如脾元薄弱之子或痘色紅潤或根暈淡紅

及白陷下塌與大便通利者切宜忌之。

徐仰垣先生曰紫草涼血解毒古方稀用今時醫治傷寒熱極與痘疹熱閉不出以此發透獨行有效今人不達此理一槩用之非矣如前醫曾氏仁齋公有云脾實協熱者可用脾虛協寒者不可用慎之慎之二句盡之矣。

○集方治痘瘡深紅色或紫或黑陷乾枯便閉用紫草三錢紅花子笮橋生地貝母牡丹皮各一錢甘草五分濃煎汁加生犀角汁十匙至五十匙量兒大小和之在二朝及三四五朝稍有元氣雖危可生痘疔立解如痘瘡夾斑疹者本方加石膏麥門冬花粉竹葉如痘毒須加

黃耆、金銀花、鼠粘子、白芷各三錢。○治癰疽便閉，用紫
草五錢、瓜蒌實一箇，打碎水煎服。○治赤遊丹毒、紅暈
如雲頭，用小鋒刀或磁碗鋒，盡去毒血，用紫草五錢、鼠
粘子一兩，研細水煎服。○治五疔熱黃，用紫草三錢、茵
陳草一兩，水煎服。○治小便淋血，小水不通，用紫草、瞿
麥、滑石各三錢、甘草一錢，水煎服。

○治吐血衄血，不大凶，亦不盡止，起居如故，飲食如常。一
歲之間，或發二三次，或發五六次，久必成勞。用紫草、懷
生地各四兩、白果肉百個、茯苓、麥門冬各三兩，煎膏煉
蜜收，每早晚各服十餘茶匙，白湯下。

黃精味甘氣平無毒

蘇氏曰黃精南北皆有以嵩山茅山者更佳可剪根長
二寸餘種之一年後即稠密三月生苗高一二尺一根
只一莖莖梗柔脆本黃末赤葉如竹不尖而短或兩葉
三葉四五六葉俱兩兩相對若偏生不對者偏精也方
少不及四月開花青白色狀如小豆花結子白色如黍
粒根如數生薑而黃亦如鬼臼黃連輩一年一節節大
不至肥地生者大者如拳瘠地生者小者如梅指二八
月采根以溪水洗淨雖曝燥亦柔潤有脂甕上蒸熟黃
黑色曝乾作菜食甚甘美其苗嫩時采為蔬謂之卑菜
煖熱淘去微苦味極鮮美又一種苗葉醜類黃精只是
葉頭尖有毛鉤子二箇但莖不紫
赤其莖蔓生乃鉤吻也誤食立死

○黃精除風濕補五藏益中氣之藥也別錄方稱為可代

穀食之不饑有延年之功醫方雖未嘗用久為仙經所
貴根葉花實皆可飢食湯酒丸散隨病制宜其性味甘
溫而和獨得戊巳之淳氣故曰黃精能補中健力氣血

精三者咸益則水火既濟金木交參而諸邪自去百病不生矣。

○集方治精神不足肝虛目暗毛髮憔悴足膝乏力并大

風癩瘡一切頑疾偏痺不愈總能治之用黃精五十觔

枸杞子懷熟地天門冬各十觔於白朮車蘼何首烏石

斛各八觔用水二石煮之自旦至夕候冷入布袋榨取

汁渣再用水一石五斗再如法煮如法榨取汁總和一

處文火熬之其清汁十存其二如飴糖以煉蜜十觔收

之每早晚各服十大茶匙湯酒皆可調下此藥須冬月

製方妙

仙茅味苦辛，氣熱，有小毒。氣味俱厚，可升可降，陰中陽也。

入手足厥陰經。

蘇氏曰：仙茅生西域及大庾嶺、川蜀、江湖、兩浙，亦有。葉青如茅而較軟，茅稍潤而有縱紋，似初生棕櫚狀。夏抽莖，勁直，至秋高尺許，冬至盡枯。春初復生也。三四月開花，深黃色，酷似梔子，瓣不結實，根獨枝而直，大如指頭。下有短細肉鬚，粗粉，外皮粗澀，內肉黃白。二八月采，根難乾，獨衡山出者，花色翠碧，結黑子，亦有白色花者。修治：以水浸，刮去皮，切作豆大，酒浸一宿，去赤汁，晒乾用。

○仙茅助陽氣，暖藏府，壯筋脈，強骨力之藥也。開寶方統治一切風氣冷痺，腰脊痠軟，足膝攣癱，不能行立，或陽道久虛，子嗣難成，或血室衰寒，胎娠罔育，或腎弱精寒，瞳人昏障，或脾虛氣憊，水穀不消。此藥培土益陽，凡屬陰凝痼冷之疾，總能治之。然味辛氣熱，性毒而烈，凡一

切陰虛發熱咳嗽吐血衄血齒血溺血淋血遺精白濁
夢與鬼交或虛火上炎口乾咽痛或水涸血竭夜熱骨
蒸或腎虛有火脚膝無力或多慾精耗不能種子或血
熱經枯不能受孕或多食辛熱炙燻之味或久服金石
丹火之藥以致筋骨偏痺癱瘓不起或胃火攻灼邪熱
不能消穀或胃熱血耗嘈雜易于作饑或三消十服五
疸八痢或諸病外寒內熱陽極發厥火極似水等證法
並禁用。

李士材先生曰仙茅辛熱雄健助陽道壯命門火若心
腹若腰足若筋骨陽明厥陰兩藏寒虛以此潤宗筋東
骨而利機關在所必需者也倘壯火熾然少火食氣者

候服必有暴絕之禍。慎之慎之。

○集方治一切風氣冷痺。腰脊痠軟。足膝癱攣。不能行立。或精虛血冷。子嗣難成。或瞳人寒障。不明。或胃寒水穀不化等證。用仙茅一觔。酒浸五日。晒乾炒。枸杞子。懷生地。覆盆子。人參。白朮。當歸。黃耆。牛膝。白芍藥。小茴香。甘菊花。蜜蒙花。知母。各二兩。俱酒拌炒。煉蜜丸。每早服三錢。白湯下。

○治跌傷打傷。杖傷。夾傷。或木石壓傷等證。或筋骨內損。血冷不散。用仙茅一味。傷在上部。作末子。食後服。每用二錢。酒下。傷在下部。作丸子。食前服。每用三錢。酒下。傷在遍身。浸酒蒸熟服。隨食前食後。亦隨量飲。

淫羊藿味辛苦氣溫無毒入手足厥陰足少陰經可升可降陽也爲命門之要藥

別錄曰淫羊藿山上郡湯山山谷今所在皆有蘇氏曰今江東陝西泰山漢中湘湖間亦有李氏曰一根數莖莖細極堅高二三尺一莖三極一極三葉長二三寸如豆藿葉如杏葉而光背淡邊有細齒薄而有刺四月開花白色亦有紫色者碎小獨頭經冬不凋根似黃連色紫多鬚羊食此草而淫故口淫羊藿以形似菜也蜀本草言生處不聞水聲者更良修治以夾刀夾去葉四畔花枝用酒浸晒乾用

○淫羊藿強陽起氣發鬱動情之藥也前古主陰痿陽絕

蓋可知矣故大氏方治男子陽弱不生女人陰衰不育老人昏耄失靈此藥辛溫發達鼓動相火凡意索情疲欲子而無其爲者宜加用之如年少之人血熱氣強精盛力充者服之陰陽頻舉意念妄爲交御多而精血走

耗不惟無子亦且損年切宜戒之

○集方治男婦精衰血冷子嗣少成服此宜節慾謹養
日一鼓而弄璋矣用淫羊藿一觔酒浸一日晒乾鹿角
膠龜板膠鼈甲膠各六兩切碎好酒溶化當歸白朮枸
杞子北五味子黃耆白芍藥懷生地牡丹皮山藥澤瀉
各三兩俱酒浸炒川黃柏二兩鹽水炒共為極細末以
三膠酒和為丸再加煉蜜少許丸如黍米大每空心服
五錢好酒下○治偏風手足不遂皮膚麻木以淫羊藿
八兩枸杞子天麻各四兩人參一兩龍眼肉三兩浸酒
隔湯蒸一日每日薄飲不得大醉極妙○治牙齒虛痛
以淫羊藿煎湯汨漱立止

狗脊味苦氣平無毒。

李氏曰狗脊出崑山山谷。今大行山澗。溫眉州深山中有之。苗尖莖細。有刺葉花兩兩相對。葉似貫衆而細。邊有鋸齒。而背皆光。根黃白色。形如狗脊骨。凸凹龍嵒有黃毛叢密。如軟刺。二八月采根。火燒去毛。細切酒浸半日。晒乾用。外有一種透山根。形狀相似。味極苦。不可服用。

○狗脊補肝腎活筋骨血脉利機關經絡之藥也。滑氏方

引前古利機關緩急周痺寒濕諸證。故時醫每治男婦

傷中羸瘠腰痛不能俛仰。痿痺強急軟癱脚弱筋骨堅

掣不能動搖諸疾。或瞳子昏蒙。或失溺不節。或淋露奔

豚諸疾。凡屬肝腎虛疲有風寒濕氣者。咸需用之。又濟

生方治衝任寒冷婦女白帶。此又屬機關不利為病。并

可治奇經諸脉。陽維陰維陽蹻陰蹻。以及督與十二經

脉經絡之機關失利為病。與諸病沿及機關者。俱可投入。以此推取。真不勝其用矣。如腎虛有蓄熱。肝虛有鬱火。精虧血熱。冬慾斷喪之人。以致已上諸疾。或小便不利。或短澁赤黃。口苦舌燥者。皆忌用之。

○集方治風寒濕氣傷中羸瘠腰痛不能俛仰痿痺強急

軟癱脚弱筋骨不能動搖者。用金毛狗脊四兩。酒浸一日。晒乾。炒草薺於白朮當歸羌活枸杞子牛膝黃柏各

三兩。俱酒洗炒。共為末。每早晚各服五錢。白湯調下。○

治骨冷癱瘓四肢不舉。用金毛狗脊四兩。如法脩製。磨

為末。大附子一兩。童便煮。搗膏為丸。如梧子大。每早晚

各食前服二錢。白湯下。○治婦人經室女白帶。用金毛

狗脊四兩。如前法脩製。白飯斷艾葉。俱醋炒。共為末。煉

蜜丸。每早服五錢。白湯下。

紫參味苦辛。氣寒。無毒。氣味俱厚。陰也。沉也。入足厥陰經。

肝藏血分藥也。

別錄曰：紫參生河西。宣旬山峽。范氏曰：今河中。淮郡三輔。高山。蜀州。亦有之。蘇氏曰：莖高一二尺。葉似槐。亦有似羊蹄者。五月開花。白色。結似蔥花。亦有紅紫而似木蒼者。結實色黑。大如二三圓。聚而生。其根黃赤。有紋。根皮紫黑。肉紅白色。肉淺皮深。三月采。根火炙。紫色。用。李氏曰：炙過。色紫。狀類小紫草。

○紫參涼血散血。行血止血之藥也。前古治心腹積聚寒

熱邪氣。通九竅。利二便。等證。統屬血所為患者。用之無

疑也。故後世如金匱方。別錄方。甄氏方。與蘇王二氏方。

共稱紫參。治諸血病。如唾血。衄血。便血。溺血。淋血。腸中

聚血。癰腫熱血。經阻瘀血。金瘡留血。下痢蓄血。或傷寒

遺熱。下血如豚肝。或陽明熱勝。血蓄如狂狀。或溫瘧寒

熱血結如昏迷。或婦人血閉不通。寒熱譫語。如見鬼祟。或男子血蘊腹脹。身面如黃疸。諸證。用此苦以燥濕。辛以散結。寒以除熱。則諸證自平矣。如脾胃虛乏。與肝腎不足。男子陰虛失血。婦人血枯經閉。俱禁用之。

○集方治唾血。嘗發。用紫參四兩。牡丹皮。川貝母。麥門冬。

當歸身。玄參。知母。乾葛。柿餅。各二兩。甘草五錢。煎汁。熬

膏。煉蜜收成。每早午晚各服十茶匙。燈心湯化下。○治

衄血。便血。淋血。用紫參五錢。水煎服。○如衄血。本方加

如淋血。本方加丹參。玄胡索。白芍藥。煨生地。俱醋炒。

各二錢。○如溺血。本方加車前。茯苓。牡丹皮。麥門冬。去

心。建蓮子。去心。各三錢。○如腸中聚血。腹脹。本方加丹

參。牡丹皮。玄胡索。桃仁。酒炒。各三錢。○如癰疽熱血。本方加金銀花。赤芍藥。牡丹皮。當歸。紅花。皂角刺。各三

錢。如經阻瘀血腹痛。本方加紅花當歸牡丹皮。
 玄胡索香附各二錢。如金瘡留血腫脹硬痛。本方
 當歸二錢肉桂木香各一錢。如下疔蓄血。本方
 芍藥懷生地牡丹皮五靈脂各三錢。如傷寒移熱于
 大腸下血如豚肝。本方加柴胡黃芩川黃連各一錢。
 生地二錢真阿膠三錢。如傷寒陽明熱甚蓄血如狂。
 本方加柴胡牡丹皮紅花青皮各一錢。桃仁三錢。大黃
 一錢五分。如溫瘧久發必昏迷如死。本方加半夏
 柴胡各二錢青皮白薇桃仁杏仁鼈甲各三錢。如婦
 人血閉不通或適來適斷發寒熱譫語如見鬼祟病名
 熱入血室。本方加柴胡牡丹皮紅花桃仁玄胡索俱酒
 炒各三錢。如男人血熱腹脹身面發黃如疸痢疾積
 滯未清早行兜瀉或瘧疾邪氣未散速行止截。累有此
 證。本方加乾漆牡丹皮青皮桃仁龍膽草茵陳草各二
 錢。已上數方。

俱用水煎服

續補方治面上酒刺用紫參苦參沙參各一兩五錢共

為末胡桃肉去皮搗和丸梧子大每服百丸苦茶下

名三七。又味苦微甘。性平無毒。乃陽明厥陰經藥。

藥氏曰。山漆生廣西南丹諸州及番峒深山中。其根黃

黑色。圓結畧似白及。長者如乾地黃。有節。味苦。後甘。頗

似人參之味。或云試法。以末摻猪血中。血化為水。乃真

今東南江浙出一種草。春生苗。夏高二三尺。葉似菊艾

而勁厚。有歧尖。莖有赤稜。夏秋開黃色花。蓋如金絲盤

紐可愛。而氣不香。花乾則如絮。根葉味甘。治金瘡折傷

出血。及上下血病。甚効。云是三七。而根大如牛旁根。與南

○山漆活血散。血行。血止血。治上下諸失血之藥也。嶺湖

方。治刀斧損傷。筋簇釘刺損傷。跌磕撲打。滾墮損傷。皮

肉筋骨內損。外破。血出不止。搗爛塗敷。或為末摻之。其

血即止。又主吐血。衄血。瀉血。便血。血痢。血崩。經水不止

或產後惡血不下。血暈。血脹。血悶。血痛。熱血癰腫。與

虎咬。蛇蟲咬等瘡。並皆治之。凡遇上件。

馮汁服。

本言集言

卷一 山漆

八

或搗渣敷或爲末。摻內服外貼。咸可奏效。仙寶也。

白及味苦氣寒性瀋無毒陽中之陰也收也

別錄曰白及出北山山谷及宛句越山蘇氏曰今江
河陝漢黔諸州亦有之生石山上春生苗長尺許葉如
初生椶苗及藜蘆兩指許大色青翠夏月葉中抽條開
紫色花似草蘭即舊蘭也八月結實黃黑色根色白
相連似木菱有三角下有臍又有螺旋紋角頭
生芽節間有毛方朔甚少質極粘膩可以作糊

○白及欽氣滲痰止血消癰之藥也此藥質極粘膩性極

收澁味苦氣寒善入肺經凡肺葉破損因熱壅血瘀而

成疾者以此研末日服能堅欽肺藏封填破損癰腫可

消潰敗可托死肌可去膿血可潔有托舊生新之妙用

也如已上諸證非關肺藏者用無與焉如已關肺藏不

係肺葉外絡為病者又無與焉但此藥質膩性澁苦平

欽肺如熱壅血瘀肺葉潰損服之可修如肺氣鬱逆有

痰有火有血迷聚于肺竅氣管之中。此屬統體一身氣道之故。理宜清肺之原降氣之逆。痰血清而火自退矣。若徒用此藥粘膩封塞無益也。

劉默齋先生曰。白及苦寒收澁。農皇主癰疽惡瘡。取苦寒涼血也。去敗疽死肌。取苦澁以去浮垢也。又治非緩不收。亦取苦寒收澁。斂束筋骨脈絡之意云。

○集方治肺熱吐血本明不止。用白及研末。每服二錢。白湯下。

○治刀斧傷損肌肉出血不止。用白及研細末。摻之。卽止血收口。○治湯火傷灼。用白及研細末。麻油調敷。

蒼朮味苦。氣溫。性燥。無毒。陰中陽也。可升可降。入足大陰陽明經

漢人鍾離氏曰。蒼朮處處山中。有之。惟嵩山茅山者良。苗高一三尺。其葉抱莖而生。稍開葉似棠梨葉。其脚下葉各有又三五出。邊有鋸齒。及小刺。花開紫色。根如老薑狀。蒼者黑色。氣味辛烈。古人用朮不分赤白。自宋人始分白者曰白朮。赤者曰蒼朮。但氣味有和暴之殊。則施治亦有補利剛柔之別。先以米泔水浸去暴氣。再以黃土拌蒸。再入乳拌蒸。晒乾。人藥用。按二朮白者補中。有燥氣。平而和。蒼者燥中有補氣。雄而烈。蒼者發汗。與白者止汗。特異。用者不可以此代彼。如欲補脾中之虛。必用白朮。如用燥脾中之濕。必用蒼朮。

○蒼朮健脾胃燥濕之藥也。此稟初夏之氣以生。其味苦。其

氣溫。其性燥。辛烈純陽。從火化也。為除濕痺之上品。安

脾胃之神方。蓋脾胃喜燥而惡濕。喜利而惡滯。喜溫而惡

寒。本草主健脾胃。療泄瀉。消宿食。行滯氣。利水濕。辟瘴

氣。散寒溫中。用不可少。若風雨山蒸。瘴霧濕氣。或頭重

目眩胸腹脹滿。或四肢困倦。腰疼重墜。或陰疝虛浮。脹痛。或足膝痺腫不仁。是皆濕氣之所致。惟蒼朮可以治之。又如瓜菓魚腥。有傷脾胃。或腹痛泄瀉。脹滿否塞。或積聚不清。霍亂吐利。是皆積濕停寒之症。惟蒼朮可以理之。凡病屬陰虛血少。津液不足。內熱骨蒸。口乾唇燥。咳嗽吐痰。吐血衄血。咽燥便塞。下痢大腸澀閉。欲通不通之證。法咸忌之。

馬瑞雲先生云。蒼朮治溼。上中下皆可通用。入平胃散。運脾去溼。入六鬱湯。又能總解諸鬱。如痰火溼食氣血六鬱者。皆因脾胃傳化失常。不得升降。病在中焦。故蒼朮爲燥胃強脾。能發越中焦陳宿水穀之氣。而疎散之。

在裏者能利。在表者能散。在上者能降。在下者能升。在中者能化。鬱散氣平。脾胃通調。能食而運。力不補而自強。氣血不培而自健也。漢人有謂燥中有補。信夫。如陰津內耗。虛火妄動之人。切禁。

○集方。治脾虛有寒濕。不能健運。爲腫滿脹泄不食諸證。或傷食不消。或氣滯不行。或水道不利。用蒼朮八兩。切片。米泔浸三日。晒微乾。再拌黃土。蒸半日。晒乾。磨爲細末。乾薑七兩。白朮六兩。厚樸砂仁。茯苓各二兩。人參肉桂。木香各一兩。後九味剉碎。俱用麩拌炒。和蒼朮共磨爲細末。錫糖爲丸。梧子大。每早晚各服四錢。米湯下。○治人受風雨山蒸瘴霧濕氣。或頭重目眩。胸腹脹滿。或

四肢困倦。腰疼重墜。或寒疝。虛浮脹痛。或足膝痺腫。不
 仁諸證。用蒼朮六兩。切片。製法如前。藁本。川芎。厚朴。陳皮。杜
 仲。胡盧巴。木瓜。防已。各二兩。後入味。剉碎。俱用薑酒拌
 炒。和蒼朮共磨為末。紅麴糊為丸。梧子大。每早晚各食
 前服三錢。酒下。○治瓜菓魚腥生冷。有傷脾胃。或腹痛
 泄瀉。脹滿。香塞。或積聚不清。霍亂吐利諸證。用蒼朮六
 兩。切片。製法如前。吳茱萸。黃連。三錢。煎湯泡浸一宿。晒乾。木
 香。厚朴。草菓仁。半夏。扁豆。各二兩。白朮。四兩。紅麴。三兩。
 茯苓。三兩。人參。一兩。後十一味。剉碎。和勻。用黃土三錢。
 調醋一碗。俱拌炒。和蒼朮共磨為末。水發為丸。每早晚
 各食前服三錢。酒下。